

# Офият



09:00 / 11.07.2023 2337

Ибн Касир роҳимаҳуллоҳ ўзининг "Ал-бидая ван-ниҳая" китобида, Ибн Асокир роҳимаҳуллоҳ ўзининг "Тариху Димашқ" китобида, Ибнул Жавзий роҳимаҳуллоҳ ўзининг "Сифатус сафва" номли китобида келтиради:

"Абдулваҳҳоб ибн Саъид айтади:

"Амир Ҳажжож ибн Юсуф ҳажга отланди. Макка билан Мадина орасида бир жойда тўхтаб овқатланмоқчи бўлди. Ходимига бирга овқатланиш учун бирор киши топиб келишини айтди. Ходим тоққа чиқиб бир аъробийни кўриб қолиб деди:

- Сени амир чақираяпди, юр!

Аъробий Ҳажжожнинг олдига келди. Ҳажжож унга деди:

- Қўлларингни юв, мен билан овқатланасан!

Аъробий деди:

- Сендан кўра яхшироқ зот мени чақирган эди. Мен унга ижобат қилдим!

- Ким экан у?

- Аллоҳ таоло. Мени нафл рўзага чақирган эди. Мен рўза тутдим!

- Шундай қаттиқ иссиқда-я?!

- Бундан ҳам кўра иссиқроқ кун бор ҳали, шунга тайёргарлик учун рўза тутдим!

- Бугун мен билан овқатлан, эртага тутарсан!

- Эртагача яшашимга кафолат берсанг шундай қиламан!

- Мен бундай қила олмайман!

- Унда нега мендан ўзинг қодир бўлмаган насиё нарса мандаги аниқ ва нақд нарсага алмаштиришимни талаб қилаяпсан?

- Жуда ширин овқат эдида!

- Уни сен ёки ошпаз ширин қилгани йўқ. Уни ширин қилган нарса офият! "

"Уни ширин қилган нарса офият!".

Эътибор бердингизми?

Неъматнинг қиймати уни ишлатиш қудратига боғлиқ бўлади, унга эга бўлишда эмас!

Баъзи бойларга, неъмат соҳибларига баъзи инсонлар ҳавас билан, баъзиси эса ҳасад билан боқишади. Аслида эса ўша бой ва неъмат соҳиби маҳрум!

Баъзи бойлар бутун бир шаҳарни тўйдирадиган таом сотиб олишга қодир. Аммо ўзидаги беморлик туфайли бир кишилик овқатни ҳам ея олмайди!

Муҳаммад Ротиб Ноблусий ҳафизаҳуллоҳ айтишича, таниқли бойлардан бири фақатгина қайнатилган кўкатлар ея олар экан. Бошқа нарса еса ўлим хавфи бор экан!

Бунга ва бу кабиларга дунё тор кўринади. Чунки дунё уларнинг кўзи ўнгида жилваланиб туради. Аммо офият йўқлиги сабабли ундан фойдалана олишмайди!

Қанча-қанча саройлар бор. Кишилар унақа саройда яшашни орзу қилишади. Аслида эса у саройлар гўё тириклар дафн қилинган қабрدير. Унда худди уй-рўзғор буюмлари каби унутилган аёл бор. Унда оталари фақат дунё билан, тижорат билан машғул фарзандлар бор. Ундаги ҳаёт кўринишда ҳашамат, воқеликда эса аза!

Бундай уй худди вафот этган чиройли аёлга ўхшайди. Уни кўрган киши ухлаб ётибди деган хаёлда унга эришишни истайди. Унинг вафот этганлигини билгач, олдидан қочади!

Бунинг сабаби, унақа уйда муҳаббат ва раҳмат йўқ.

Агар Аллоҳдан бир нарса сўрасангиз унга қўшиб офият ҳам сўранг. Чунки офият бўлмаган неъматда қиймат йўқ!

**Абдулқодир Полвонов**